



ICC T20I Rankings: Abhishek Sharma-i Sahibzada ajatetogo

US House nung Russia merenshitsü bill agizükogo



IMDH atema Ao Senden-i state sorkar nem anogo 30 atakzüksür

Dimapur, Rongjui/Sept. 17 (TYO): Imkongliba Memorial District Hospital (IMDH), Mokokchung dak sendakba nung takhangba asem agütsür mapang talangka aruba bentettsü asoshi Ao Senden-i Nagaland sorkar nem anogo 30 atakzüksüogo.

Ao Senden-i September 16, 2026 nü Chief Medical Officer, Mokokchung ajanga Principal Director, Health & Family Welfare dangi takhangba agüja züluba shiti ka nung, IMDH nung radiologist aser dermatologist atema nübu meshia liasü.

Parnoki mozüki ya IMDH indang tasen yanglua aliba Block A-i belentsü aser attachments nung aliba doctors aser nurses ajunga IMDH dangi yoktsüa akhang.

Item takhangba atema Directorate of Health & Family Welfare nungi tangsa mera agitsü nüngdaker, ta Ao Senden-i ashi.

Anogo 30 tsüngta nüngdakba mera magira, ochi temeden asoshi onok ola ya sorkar inyakyim level ajunga nung angashitsüsa onoki mera agitsü, ta Ao Senden-isa tekum dangtsü ashi.

CM Rio-i Mangkolemba multi-purpose hall indang report meshir

Dimapur, Rongjui/Sept. 17 (TYO): Sorkari senotsü teyari agüja yangluba multipurpose hall project ka Mangkolemba nung aliba dak sendakba nung Nagaland Chief Minister Neiphiu Rio-i department dang report meshiogo aser iba facility yangluba tesem indang osang angazüka aoksa ta ashi.

Brehostibarnü Chümoukedima nung sentong ka agiba sülen osangbener den jembidang, Longtho yimtsüng nung Minister Temjen Imna Along den sendaktepa aliba kimong nung iba hall yangluba indang Rio dang asüngdanga liasü.

Sorkari tongtipang süa inyakbaji district headquarters ajunga nung multipurpose halls yangluba ya lir aser iba sülen sub-divisions nung yanglutsüba lir, ta Rio-i langzü. Yimtsüng shia iba ama facilities yanglutsübo tamakoktsü, kechiaser yamaji inyakti süra halls meyirijang aika nüngdaksü, ta pai ashi.

Ajisüaka Mangkolemba project ka komasür iba tesem nung yangluar pai memeteti liasü, ta ashi.

Komasür project yangji inyak ta department dang asüngdanga liasü aser osang tejangja meshiogo, ta chief minister-i ashi.

Directorate of Youth Resources and Sports ajanga iba project aser tesem bhukuma sangdong ka agütsür ita ka shi lir Rio-i iba o ya ashi.

Directorate ajanga August 11 nü jangjashitsüba nung, Mokokchung district kübok Mangkolemba nung iba facility yanglutsü atema work order ka July 2024 nung M/s Aren

Enterprises nem agütsü, ta shia liasü.

Geographical coordinates densema detailed project report (DPR) ya Ministry of Youth Affairs and Sports ajanga agizükba sülen sanction asü, ta ashi. Tesem ya agizüka aliba documents nung aliba ama Mangkolemba Circle küboki aiter aser iba sülen project ya geo-tag süa aliba tesem nung inyak, ta directorate ajanga ashi.

Iba yimtsüng indang putu menden den külemi tesem jangjatepba sülen additional deputy commissioner (ADC), Mangkolemba ajanga Land Availability Certificate agütsü, ta department-i ashi. Ajisür iba ali nungya mangatetep mali ta kuli süa NOC agütsü.

Directorate ajangasa ashiba agi, Ministry of Youth Affairs and Sports aser Sports Authority of India (SAI) nungi ketdangsürtem den senden ka amenba sülen state sorkar ketdangsür aser Ministry nungi teshimtet nisungtemi kumtetba project monitoring committee kati iba mapa jangjatepa liasü.

Committee yagi iba report ya December 9, 2025 nü agütsüdang project noklang shilem renemogo ta kuli agütsü, ta department-i ashi.

"Multi-Purpose Hall, Mangkolemba" nüngja ya Ministry ajanga agizüka project documents nung amshi, ta directorate-i jangjatsü.

Ajisüaka project documents nung tesem ya Mangkolemba ADC headquarters mesüra Mangkolemba town ta kodanga shia mali, ta Directorate of Youth Resources and Sports ajanga shia liasü.

Linük terenlok nung NE tiyong südaktsüba asoshi PM Modi dang pelar: CM Rio



Brehostibarnü India Ato Kilonser Narendra Modi küm 76 ajungba anogomung munga Niathu Resort, Chümoukedima nung sentong ka agiba mapang CM Rio-i cake alemba noksa nung angur.

Dimapur, Rongjui/Sept. 17 (TYO): Naga People's Front (NPF)-i Brehostibarnü Ato Kilonser Narendra Modi arishi küm 76 ajungba anogomung munga Niathu Resort, Chümoukedima nung sentong ka ayongzüka liasü.

Iba sentong nung Nagaland Chief Minister Dr. Neiphiu Rio-i jembidang, Ato Kilonser Narendra Modi-i mapa agi pa lenisüba tajung sayur, pa dak nükjidong tejangja lir aser linük mezüng südaktsüba tangatetba nung masetshi nokdaker, ta ashi. Asen linük tongtipang mapang ka nung pa ama lenir adokba ya asen linük asoshi kanga tia taka, shibai arishi tepiyong linük tenzükba nung bendanga agütsür arur, ta ashi.

Modi lenisüba ajanga asen linük terenlok maparen melenshiba kisüng masü saka alima matsüngdang India indang otsüa melenshitsüogo, ta pai ashi. India-i tasü ita jembishinüba yimya melenshiogo aser tongtipangsa alimai India dak ranglokba yimya-a melenshiogo, ta CM Rio-i ashi.

Pa lenisüba kübok North-East melenshiba ya balaka züngshitsü langa lir, kechiaser North-East

merenloki India terenlok merenmettsü ta pai shijen shia arur. Iba tangatetba ajanga asen region ya India terenlok asoshi shisadanga inyakba nung tiyong südaktsür, ta Rio-i ashi.

Union Government tematiba jenjang nungi tanübo North-East nung temulung agütsür. Union Ministers aser ketdangsür temi mapang shia asen state semdanga projects tem asadanger aser nüburtem aser stakeholder den indang-indanga sensaksem amar. Iba ama inyakyim ajanga asen nüburtem mainland nungi mepila ama angatetdaksür, ta ashi.

North-East tesem ajunga nung flagship national programmes aser mejeta inyaksangshiba ajanga terenlok yimya melenshiogo. Aspirational districts & blocks, ki o jen terenlok, PM-DevINE aser SASCI ama lenmang tesendaktep sentongtem ajanga Nagaland ama states tem mapang talangka nungi tebilemtsü lir aruba samaja mangdang jenti asangsang kumtsür, ta Nagaland CM-i ashi.

Ajisüaka tanü asen teinyaktsü ya tesülen meyipa takok ngua aliba reprangba kisüng masü. Tasoba anogo ya tejaklen

ranglokba mapang ka lir. Asen linük nüjiso ngur küm 100 ajungba mapang India ya 'developed nation' ka kumer lidaktsütsü temulungtetba nung ato kilonser-i Viksit Bharat @2047 mangdang yua lir.

Lenla ajaklen yimchiyimjunga tejakleni aotsü asoshi state ajungai iba inyakyim nung shilem agitsü iba sentong (Viksit Bharat) yagi ayongzüker, ta ashi.

Tanübo India ya alima nung rongsenketzüng tulutiba linüktem rongnung dena lir aser international affairs tsütsüa tongtipang tashi ka ama alimai züngshir ta pai ashi.

Chief Minister-i Nagaland nung aliba nüburtem, sorkar aser alliance nung aliba political party ajunga tenüng nung Ato Kilonser dang tasoba anogo salem lemsatet aser North-East nung maneni temulung agütsüba, Nagaland yariba atema pelaba lemsatetpa liasü.

Iba sentong nung PDA alliance partners NPF, Bharatiya Janata Party (BJP), National People's Party (NPP), Janata Dal (United) (JDU), Republican Party of India (Athawale)) (RPI(A) aser Lok Janshakti Party (Ram Vilas) nungi lenirtemia jembia liasü.

Nagaland nung NE Education Conclave 2026 ayongzüksü

Dimapur, Rongjui/Sept. 17 (TYO): Nagaland-i JP Park , Naga United Village Chümoukedima nung 'Implementation of NEP 2020: Vision, Challenges & Opportunities for the North Eastern States' omen kübok northeastern region atema mezüngbuba Northeast National Education Policy (NEP) 2020 Conclave ayongzüksü.

Brehostibarnü Hotel Saramati, Dimapur nung osangbener senden ka nung jembidang, NEP 2020 ya linük nung shisaluyim yimya rangben tajungba kuma melenshitsü atema mangdang tajung akaba sentong ka lir, ta Minister Higher Education & Tourism, Nagaland Temjen Imna Along-i ashi.

Iba nükjidong tongtettsü aser

grassroot level nunga iba temelenshi metettsü atema conclave ayongzüksü sentong ya benok, ta ashi.

NEP 2020 indang lenla balala, talisa Northeast region atema roadmap yanglutsü aser region nung takok ngua mapa kuma inyaktisü atema tasa yanglutsü nükjidong nung iba sentong ya ayongzüker.

Region nung külemi inyaktisü atema team ka yanglutsü aser states balala nungi pei reju shia NEP 2020 mapa kuma inyakba nung tongtipang shilem agitsü teimla lir, ta Minister Temjen Imna Along-i ashi.

Nagaland nung tang education system ya lenla aisü nung metokmeperi lir. NEP 2020 mapa kuma amshitsü atema sorkari kaket rejutem nung senotsü

indoktsü nüngdaker aser yangji colleges, schools aser universities atema ki o jen tasen aser tang aliba ki o jen tajungba kuma yanglushitsü nüngdaker.

NEP 2020 takok ngua amshitsü atema stakeholders ajunga nungi yaritsü nüngdaksü.

Iba sentong ya NEP benjongba kisüng masü saka tayongzüka alibattem bushiteta aji koktettsü asoshi lenmang bushia region rangben nungia Government of India nem pangzüng agütsütsü asoshi lir, ta Secretary, Higher and Technical Education, Nagaland, Sarita Yadav-i ashi.

Iba sentong nungya Northeastern states ti prongla nungi delegates tem densema nisung 300 dak tema anogo ana sentong nung shilem agitsü.

FAC nung Dr. Tsukjemchila den tepila sentong agi



FAC nung Dr. Tsukjemchila den tepila sentong agiba mapang tangokba noksa angur.

Dimapur, Rongjui/September 17 (TYO): Fazl Ali College, Mokokchung nung September 16 nü Assoc. Professor, HoD, Dept. of Geography Dr. Tsukjemchila Imchen den tepila sentong agiogo.

Sentong nung Dr. Tsukjemchila nem, lai bendanga agüja inyakba aser Higher Education atema teyari agütsüba den mejeta college nem teyari tulu agütsüba atema tetushi agüja liasü. La ya tetsürtem rongnung Nagaland nung Dept. of Geography nung shimba mezüngbula aser tetsürtem rongnungi Geography nung Ph.D angurtem rongnung mezüngbula lir. Maneni küm semer asem tesayuba wadang nung nokdangba sülen la Department nungi mapa nungi anisüngzüker rongnung mezüngbula kümogo.

Sentong nung o jembiba mapang Principal Dr. I Wati Imchen-i, la ya kanga dang tesangra aser college asoshi tongtimbang nükdang ka liasü, shibai college ajungkettsü asoshi la mapang aser shisatsü agütsüogo, ta ashi.

Sentong nungsa Assoc. Professor aser tang Department Hod Dr. Temjensangla Pongener-i, Dr. Tsukjemchila tenure mapang Geography Department indang academic infrastructure koda melenshi iba indang lemsatep. Laisa, Dept. Library ulushiba, Cartographic laboratory akangshiba, Remote Sensing Laboratory renloka aoba aser Mini Soil Laboratory amenokba indang lemsatepba liasü, koba ajanga kaketshirtem nem kaketsü alia inakyim balala ajanga angazüktsü asoshi sabang tajung agütsür, ta ashi.

Mapa nungi anenba tesayur ya nükla tajung akteba lenir ka shibai mapa nungi anenba sülena department aser college indang nükla maneni lemsatep , ta laisa shisem.

Assoc. Professor, Dept. of Botany aser Fazl Ali College Teachers' Association (FACTA) tir Naomi-i, Association tenüing nung jembiba aser lai FACTA atema mapang tajung aika inyaka toktsüba indang lemsatep. Laisa, All Nagaland Government College

Teachers Association (ANGCTA) tenüing nung mapa nungi anenba tesayur nem kuli kaketsü ka agüja liasü.

Maneni kaketshirtem tenüing nung Fazl Ali College Students' Union (FACSU) Asst. General Secretary Y. Yonkai Phom-i o jembiba liasü.

Tepila o jembiba mapang Dr. Tsukjemchila Imchen-i, college nung Post-Graduation Program tem tenzüktü nüngdakba lemsatep, koba NEP 2020 nükjidong ataloktsü atema tenüingdaktsü tongtimbang rongnung ka lir, ta ashi.

Laisa, faculty dang tetsükdaktsü balala aruba ajanga tezü madangtsü saka tejangraba tulu nung bendanga agüja inyaktsü ajungshi.

Iba sentong ya Mesutoba Ao, Assoc. Professor & HoD, Dept. of History lenisüba nung agi, kaketshirtemi ken tajung ka aten aser Dr. Imliwati Longkumer, Asst. Professor, Dept of Chemistry-i temaotsü meshizüka sarasadem. Sentong nung kaketshirtem, tesayurtem aser non-teaching faculty temi shilem agia liasü.

Industries & Commerce-i IITF nung shilem agitsü jaoker

Dimapur, Rongjui/September 17 (TYO): Directorate of Industries & Commerce, Nagaland-i sangdong ka ajanga, India International Trade Fair (IITF) nung shilem agitsü asoshi state nungi temsüa aliba artisan, sütaker, craftsmen, entrepreneur tem jaokogo.

IITF ya Bharat Mandapam, New Delhi nung November 14 nungi 27 tashi agitsü. Taküm IITF omenji "Vikas aur Viraat"

(Development and heritage) asütsü.

Iba Trade Fair nung shilem agitsü jangrartem tenüingdakba inakyim balala aser verification atema tsüngtong arutsüla. Verification atema aruba mapang selection Committee-i asadangtsü asoshi pei yanglutetba osettem bener arutsüla. Udyam registration, aadhar card, award certificate (lira) passport photo amala

tenüingdakba kuli kaketsü bener arutsü nüngdaker.

Osettem asadangba sülen jenjang koba tajungba, piesasa apiteta yangluba osettem aser koba osettemsa yoktetsü item nem tama maongka agütsütsü.

Maneni plain paper nung application zülur October 7 nü tashi nungbo benoktsüla. Atakzükja aliba anogo süitemba sülen application kecha magizüktsü, ta kasa sangdong ajanga metetdaktsü.

DoT&A-i WhatsApp nung Pensioners' Information Channel lapokogo

Dimapur, Rongjui/Septemeber 17 (TYO): Directorate of Treasuries & Accounts, Nagaland-i, pension verification, Jeevan Pramaan/Digital Life Certificate, department indang osang balala aser tanga tongtimbang osangtem mapang shitak nung agütsütsü atema WhatsApp nung official Pensioners' Information Channel ka lapokogo.

State sorkar kübok pensioner aser pensioner kibongtem ajak dang iba channel sülen anidaktsü mepeshia metetdaktsüogo. Iba channel nung adentsü atema tantsür tamburtem nem teyari agütsütsü mesüra parnok tenüing nung iba channel follow asütsü asoshi kinungertem dang mepeshia



metetdaktsüogo.

Treasuries & Accounts, Nagaland - Pensioners' Information Channel nung adentsü atema QR Code scan sütetstü.

Iba channel nung adenba sülen osang balala angutsü atema notifications lapoktsütsü mepeshia metetdaktsüogo.

Item number 8798747800 / 8798747826 tem ya WhatsApp nung Pensioners Helpline asütsü.

C-Edge College nung seminar ka ayongzüka agi



Chümoukedima, Rongjui/September 17 (TYO): C-Edge College, Chümoukedima Department of Political Science-i ayongzüka A Discourse on the Bengal Eastern Frontier Regulation (BEFR), 1873: Understanding the Legal Foundations of Inner Line Permit (ILP) ta nüngj agütsür Post-Seminar Knowledge-Sharing and Discussion Session ka ayongzüka agiogo. Iba sentong ya September 16 nü GK Auditorium nung agia liasü.

Iba sentong nung faculty aser kaketshirtem longjemer Nagaland nung Inner Line Permit system benokba koda tenzü, temzüing özüngi kechi ashir aser tanü tendak nunga apet mapet iba indang sensaksema liasü.

Sentong nung o jembiba mapang Principal Emeritus Dr. Chubatola Aier-i, contemporary institution tem puti otsü aser temzüing özüng kübok tamendakdak angatetsü koda tongtimbang iba indang lemsatep. Laisa, iba colonial-era regulation ya tanü tendak nunga apet mapet aji karibo ashishitsü akok mesüra iba provision ya karibo mashiymi amshitsü akok, ta ashi. Lai, iba amala regulatory provisions tem ya ajak ajangzüktsü atema ajang ajanga benoktsüla ta ashi.

C-Edge College Principal, Dr. Moameren Pongen-i, BEFR 1873 tenzüka indang

jembiba aser ashiba agi, Inner Line system ya tanü tendak nunga koda tapet iba indang lemsatep. Pai lisopurtem temeden aser maitsü, bendangertem senoka aittsü aliba aziökba aser state nung alirtem tejangraba apir yanglushiyonga aotsü nüngdakba dak rangloker jembiba liasü.

Sentong nungsa Assistant Professor aser Political Science Department HoD, Duvalu Rhakho-i, Articles 19(5) aser 371A dak ajemdaker temzüing özüng kübok ILP indang jembiba. Lai, temzüing özüng kübok ILP indang rateta ashi, aser lisopurtem temeden kümzüka yur shishilembatsü aser investment atema lenmang lapoktsütsü asoshi inakyim tapet nüngdakba indang lemsatep.

Sentong nungsa Assistant General Secretary, CECSF, Solunto aser BA V Semester Tiawala natia tena tebilemba lemsatepa liasü.

Presentations balala agütsüba sülen BEFR 1873 renloka aruba, temzüing özüng kübok tamendakdak aser tanü tendak nung tapet asü masü iba dak sendakba nung kaketshirtem aser faculty tem sensaksema liasü.

Sentong ya C-Edge College tir Er. Moa Aier-i anküp o jembir tembanga liasü, shibai ILP inakyim ya koda tongtimbang iba indang lemsatep.

DGC nung IBM Skillsbuild Orientation & Training Sessions agi



Dimapur, Rongjui/September 17 (TYO): IBM Skillsbuild for Adult Learning (SB4AL) dak sendakba nung September 15 nungi 17 tashi Dimapur Government College nung training sentong ka takok ngua agiogo.

Training nung shisalen sayurji Soft Skill Trainer Kamalesh Krishnaraj liasü.

Iba training session ya EDUNET Foundation (Gurugram, Haryana) aser Directorate of Higher Education, Nagaland, IQAC

asir Career Guidance & Placement Cell, DGC nung longjemer ayongzüka liasü.

Training mapang IBM Skillsbuild programme indang metetdaktsü. IBM Skillsbuild programme kübok kaketshirtem mesüra mashi kati machine AI learning nungi tenzüka leadership course aser resume zülutsüba amala course tezübatem kobasa züngoksema lir item indang training agitetsü.

Course balala atema training agiba sülen kuli kaketsü agütsür. Item course tem ya

angati dang agütsür aser item course tem ya alima nung shisa takatibatemi yangluba lir.

Training session asemprongla nung kaketshirtem tangazükba tulu kaogo, koba Nagaland nung aliba lanurtem sempet aser tasa balala arangtetsütsü asoshi lir.

Lanurtem nem maparen balala angazükdaktsüba aser mapa balala ya teka amteper aoer, aser iba amala training tem ya tang kanga nüngdaker. Ajak senteper iba training nung kaketshir 1600-i shilem agia liasü.



September 17, 2026 nü New Delhi nung SEMICON India 2026 semzükba sentong nung Ato kilonser, Narendra Modi adenba noksa nung angur.

PM Modi arrshi küm 76 jungogo; lenirtemi salem osang lemsatep

New Delhi, Rongjui/September 17 (Agencies): Brihostibarnü Ato kilonser Narendra Modi arrshi küm 76 ajungba anogomong nung linük Tir Droupadi Murmu, Uttar Pradesh Chief Minister Yogi Adityanath, Union Minister tem aser BJP lenirtemi tasoba anogomong salem osang lemsatepba den külemi pa nem tetushi agütsüogo.

Tir Droupadi Murmu-i X ajanga, "Küm 25 tashi Chief Minister aser Ato kilonser inyakba mapang nung Modi-i junga yimsüsüba dak sendakba nung inyakyim tasen aika latettsüogo aser lenla ajak nung terenlok atema lenmang tasen sayuogo," ta metetdaksü.

Murmu-isa, India terenlok

lenmang nung jajadar, ta metetdaksü.

Laisa, maneni nübur tenzüksü aser linük yangertsü atema Modi nem anema aliba taküm aser arrshi talang moajang ta sarasademtsür, ta metetdaksü.

Uttar Pradesh Chief Minister Yogi Adityanath-i, Modi ya alima nung nüngtugutiba lenir lir aser "India Tasen" yangersang lir, ta ashi.

Yogi-i X ajanga, Modi-i linük mezüng südaksüba aser nübur tenzükba ajanga "Terenlok India" alizüng atongtsü atema ajungmesor, ta ashi.

Paisa, Modi lenisüba kübok tangar dak memetalokba, ketdangsübaren, sobaliba asentenshi aser alima nung

akhümket tsütsü India jenjang tajungba kümdar, ta ashi.

Union minister Sukanta Majumdar-ia, Modi-i inyakba mapatemji nübur tenzükba küm ajanga dang masadangtsüla saka pai linük tejakleni anir aoba ajanga asadangtsüla, ta ashi.

Majumdar-i, Modi lenisüba kübok India nungér nisung crore 25 bo kanga sensak tia nungi anitetogo, ta ashi.

Paisa, alima nung rara ajanga rongsenkettzüng kongshiaka India nungér GDP ainba shilembo 7.8 nungi 8 kümogo, ta ashi.

Modi asoba anogomong nüngtem nung BJP-i state ajak nung 'Seva Sankalp' campaign tenzükogo. Iba sentong ya ita ka piyong agütsü.

Delhi nung voters lakh 47 agienba ken o Supreme Court-i angadangtsü

New Delhi, September 17 (Agencies): Delhi nung Special Intensive Revision (SIR) exercise agiba sülen voters lakh 47 tenüng agienba anema Supreme Court nung temepishiba ken o ka agütsü; ajioda Brihostibarnü Supreme Court-i iba ken oji angadangtsü melungogo.

SC-i iba ken o ya September 21 nü angadangtsü.

Election Commission-i draft roll ya August 31 nü sangdonga liasü. Delhi nung voters crore 1.45 aliba nungi shilem 30 dak tali tajemba kümogo.

Chief Justice Surya Kant den Justice Joymalya Bagchi aser Justice Venkita Subramani Mohana nungeri akümba bench-i iba ken o ya Hombarnü (September 21) angadangtsü melungogo; iba dak alia Special

Intensive Revision exercises dak sendakba ken otem-a angadangtsü.

Temepishiba ken o agütsür atema ken o jembitsür Advocate Prashant Bhushan-i Supreme Court dang, Election Commission-i draft roll nungi tenüng agienba nisung lakh 33 nem notice agütsüogo, ta metetdaksü.

Bhushan-i, kechiba EC-i notice agütsüba tenüngtemji yimjak nung mesangdonger mesüra electoral roll nungi tenüng agienba kuli memetetdaksür?, ta asüngdang.

Tamalen Election Commission-i, nisung lakh 43.32 bo parnoki agüja aliba tesem nungi aienshiadokogo mesüra revision exercise agiba mapang nung maliasü, ta metetdaksü.

EC-isa, voters lakh 2.82 bo süadokogo aser voters lakh 1.41 ibo tesem ka dak tali nung register süa lir, ta metetdakja liasü. August 31 nü Delhi nung draft electoral roll sangdongba mapang Delhi CEO-i, draft roll nung voters lakh 47.7 züngdokogo, ta metetdakja liasü.

Draft roll nungi züngdokba voters ji Absent, Shifted, Dead, Duplicate and Others (ASDDO) categories kübok "uncollectable" ta züngshia draft roll nung mezüngok.

Delhi CEO-isa, draft roll nung züngdokba voters-i September 30 anogo tashi nung Form 6 den külemi nüngdakba documents agüja temepishiba agütsütsü akok, ta metetdaksü.

Final electoral roll taküm November 4 nü sangdongtsü.

DMK lenir Kanimozhi-i opposition lenirtem aika ajurua arudar

New Delhi, September 17 (Agencies): Mapang shia Congress party medeni Third front ka tentetsü atema aikati meranger; yamaji Lok Sabha election agütsü atema ano küm asem lia DMK-i third front ka tentetsü atema inyaksangshi tenzükogo.

Tesüiba hopta ishika tsüngda DMK Lok Sabha MP, Kanimozhi-i opposition lenirtem aika ajuruogo; lai talisa regional lenirtem ajurudar.

Lai kobi melii Kolkata-i oa Trinamool Congress tongti Mamata Banerjee ajurutsü.

Tamil Nadu nung Congress-DMK teloktep liasü, ajisüaka assembly election sülen Vijay-i aniba TVK yaria sorkar kümdaktsütsü atema Congress-i DMK den teloktep raksa. Iba mapang nungjagi tenzuka MK Stalin-i aniba party-i Congress anemer. June ita nung opposition INDIA teloktep senden nunga DMK-i maden.

Taküm tzüngluruwa mongpu Parliament senden jelia Kanimozhi-i shidi ka ajanga Speaker dang lar party MP tem atema temeja menden lemozükjang ta mepishia liasü. Ajioda Lok Sabha Speaker Om Birla-i agizük.

DMK MP Kanimozhi-i mezüng Shiv Sena (UBT) tongti

Uddhav Thackeray taoba hopta ajuruogo. Iba senden nungji delimitation bill aser INDIA teloktep atema jembia liasü.

Kanimozhi aser Uddhav natisa regional party temi opposition nung tongti shilem koma agitettsü, iba atemaji o lemtepa liasü.

Iba sülen Kanimozhi Delhi-i oa NCP (SP) tongti Sharad Pawar aser par jala Lok Sabha MP Supriya Sule na den senden amen.

Maneni Kanimozhi-i Kolkata semdanga TMC tongti, Mamata Banerjee ajurutsü.

DMK leniri regional party lenirtem ajuruba ya third front ka tentetsü atema lir ta aikati bilemer, ajisüaka Congress medenibo kecha mesüteter.

2013 küm Mamata Banerjee-ia Congress medeni federal front ka tentetsü meranga liasü. Küm pongu lir sülen Telangana Chief Minister K Chandrashekar Rao-ia Mamata aser Naveen Patnaik nungér ajurua third front ka atema jembi, saka kecha mesütet.

2024 küm Lok Sabha election jakdang AAP tongti Arvind Kejriwal-ia opposition states tenet nungi chief minister tem jaoka longjemtsü atema jembi, saka kecha mesütet.



New Delhi, September 17, 2026: Brihostibarnü New Delhi nung Ato kilonser Narendra Modi asoba anogomong nüngtem nung BJP lenir Vijay Goel-i 'Run for Vikshit Bharat' tenzüksüba noksa nung angur.

J&K nung Udhampur operation kübok JeM kiralongrar ana khaset

Srinagar, September 17 (Agencies): Jammu & Kashmir kübok Udhampur district nung aliba arem nung kiralongrartem mita aoba mapang nung Pakistan nung amenoka aliba Jaish-e-Mohammad (JeM) kiralongrar telok nungi züngsem ana khasetogo.

Brattal Sohan aser Khubban areas nung tzünglu maneni arur, ajisüaka Army, Jammu and Kashmir Police aser CRPF sepaitem senteper maneni kiralongrartem mita aoer.

"September 16-17 ayaterm mapang nung intelligence osang ka ajanga Brattal, Udhampur nung kiralongrartem aliba metetdaksü. Tsüngsang mopung kanga mejungi liaka White Knight Corps, Police aser CRPF senteper kiralongrartem mita aoba mapang nung kiralongrar ana khaset," ta White Knight Corps-i metetdaksü.

"Tang tashi kiralongrartem mita odar aser iba tesem nung maneni kiralongrartem bushidar. Security sepaitem maneni lemozükja kiralongrartem bushia amokmeren ajak samatsütsü," ta Jammu nung amenoka aliba White Knight Corps-isa metetdaksü.

Taoba hopta iba arem nung k i r a l o n g r a r t e m senzüsembongba jangjaba sülen nungi police aser security sepaitemi kiralongrartem anema operation tenzuka liasü.

Osang tasen angazükba nung ajemdaker Bodhbar aonung 9:00 ako meta security sepaitemi tesem ka longbanga liasü. Iba sülen mapang tatsüka tsüngda injang ola kar angashi, aser Brihostibar anepongi kiralongrartemi tama sepaitem dak injang khalokja liasü.

Iba sülen iba tesem jagi sepai tali yoksema liasü aser maneni kiralongrartem mita aoba mapang nung anaji khaset.



Nashik, September 17, 2026: Kibur maliba azüi nisung nem timtem kanga agütsüba angatetdaksütsü atema Yuva Sena (UBT) nung inyaker kati azü ka puer oa Niphad Nagar Panchayat nung chief officer, Dheeraj Bhamre indang table nung puzüka yutsüba noksa nung angur.



TIR YIMYIM YIMOBILEM (EDITORIAL)

DIMAPUR FRIDAY, SEPTEMBER (RONGJUI) 18, 2026

Light meter azünger mali !

Nagaland Power department kübok inyaker maliba ajanga light atsükba ki aser tesem shia ita nung light atsükba sen jenjang sükdanga agütsütsü pur 'meter reader' peria mali ta Power department nung tongti ketdangser kari ashibaji light atsükertem asoshi taoksatsüka lir. Iba jagi Nagaland nung tangalen nungi light bener arua atsükba sen magütsütetba timtem ya light atsükertem dak nungi masü saka Power department nungi adoker ta angateter. Atangji, Nagaland nung light atsüker lakh asem ser tesadang lir, tetezü meter box lakh asem ser tesadang lir aser item meter box shia nung meter zünger light bill adoktsütsü pur meter reader nisung 300 dang lir ta ashibaji tamamangtsüka, kechiyong aji shitak asünungbo meter azünger shia meter box 11, 666 atar, tetezüji ita shia meter reader kati ki mesüra tesem 11,666 tonga oagi meter zünger light bill adoktsütsüla. Aji, nisung asoshi tamakoktsü. Ibayongji, ki aika nung meter azüngerbo arua mangur saka light bill-bo arur. Aji shitak masü. Iba jagi ki kar nung light bill kanga ajema adoker aser kar nungbo talila adoker. Ibaji dang masü saka ki aika nung meter box mali ser light atsükba memeteti alitsü, kechiyong itemjia meter azüngertemi light enoka aliba ki sema oa meter azüngba mapang dang putettsü. Aji oda,. Asenoki light meyaka matsükba dang masü saka Power department-i anir light atsükba meter tashi junga mazüngba mapaji kidang kibur o kilir na prongla mapa mayim meshitak aküm amai lir. Iba jagi nübortemi Smart meter enoktsü asoshi arendaker asütsü, kechiyong meter jibo smart asütsü saka asen meyong Power department nung inyakertermi smart masütsü. Aji oda, nübortemi Smart meter meinoknüba ya Smart meter dakji temulung malemer masü saka Power department nung inyakertermi dak temulung malemer ta angateter. Atangji, kechi mapa nung südirsüaka, temulung lemtetba ya ali rongsen danga taoba, kechiyong kecha makayonga kati ka dak temulung lemtetra ajak kar amai bilema inyaksü, saka senotsüa aika akayonga aser nübo aika aliyonga kati ka dak temulung melemtetra mapa tajung ka asoshia melungjemtettsü. Tanü Nagaland nung Power department dak dang masü saka nübortemi temulung lemtettsü sabo department kata mali kümogo. Iba jagi Nagaland shiranger. Ashi, nübortemi temulung lemtet nungbo, putu melenshia aienba yari Power department purtemi light atsükertem asoshi Smart meter bener arubaji kecha menungnangi dang pelashishia agizüktsü. Ajisüaka, light shitak aru maru ta mali light bill kasa dang adoker. Aji dang masü saka light atsükba meter azüngibo marur saka light bill-bo arur. Yimdong nung street light tejang anasemka tsüklokbajia anüngdanga maseper aser aji majung akümdang temelentsür kibur mali akümer. Ibayongji, nübortemi temulung malemer. Department nung inyaker peria aliba malibaji government-i metettsüla aser light agütsü tashibo light atsükba meter azüngerbosa peria alitsüla. Tanü putu nungbo nisungtem asoshi nüngdak tulutibaji electric light kümogo, kechiyong light agidang kechisarina yanglur, anungji light marura chiyonga athitsüba putu nung asenok alir. Ibaji meteta, Power department nung inyakertermi ajak dak nisungtemi temulung lemtettsüa inyaksübaji kanga tongtibang kümogo. Aji oda, Power department nung inyaker tuluba nungi tilaba tashii nübortemi temulung lemtettsüa kodang inyakdir, idangjibo Hydro project-tema kong yanglutsü nüngdakdir yangji yanglutettsü aser Smart meter-a raktepa enoktsü. Aji oda, kodangang Nagaland nung ochi agi manüangi mapa nung nendaka inyadir, idangjiang electric light-a talubosa angutsü.

OLEMSABANG

JENTANGI MEYIPTSÜ

~ C. Lima Ozüküm

Lumia yaa tzüra aliba lima
Kodanga tepok masünger
Moapu nung tzü shioktsü ama
Tagishi maka timtemer
Moatsüba ajak amatok
Penpujen penpua dang alir.

Nisung ajaki taküm libaliru
Inyaksangshi yimyayimpong
Jembishinü kechisar'natem
Meyipa khen bilemdangang.
Timtemer kar yaria lir na?
Alangba pur mesoa lir ma?

Tsüngrem moatsüba asadangra
Tenem lenden tobur tajung
Tzü mopung temerük talubo
Alima rangben angati
Liaka melima agütsü
Pa temeim kodang züngmatsü.

Moajang agüjang kua agi sünger
Meshimetsüa pokyimer
Matong meperi tenük masüng
Jeptepa sarasademer.
Ne temoatsü züngdangangma
Züngaka mezüngma pelatsü.

Shibai jala jabaso moatsü
Shibai rongsen agütsü
Shibai lendong nungi kümzük
Shibai teti anüker
Shibai tangu sashidaktsür
Ali rongsen rongnung tambusang.

Asühwa ta temulungjang marongdang
Tebang temeli ajungdang
Tashiit mapang mesüidang
Tetsüng teben maraktepdang
Yihova Tsüngrem peladakjang
Lozüngtem nung pai moatsütsü.

Tajenzük tia nung alir ajiang
Ne taküm den medemdangang
Pa temeim tali jangjatsü
Tenlatettsüsa alidang
Mapang tajung ya alangzükang
Asüng asoshi tatasama.

Leper nungi tenlatsü tamakoktsü
Atapisüa tekazü
Tajungtiba nai agütsüra
Noklang temloker angutsü
Tesamar ama tetsübu
Reptepa jentangi meyiptsü.

OLONG RATET

- | | |
|--------------|------------------|
| 1. Penpu | : Aginü/Nükshi |
| 2. Asühwa | : Sasaba |
| 3. Lozüngtem | : Tetemsü mapang |
| 4. Reptepa | : Anüsü |

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agütsü mepishir

Cuba nung pastor ka ita asem pua ayuba sülen chiokogo



Pastor Alexis Padrón Lorenzo aser kinüngtsü Roselin Benítez Cruz

September 17, 2026: Cuba linük nung Protestant pastor ka ita asem dak tali pua ayuba sülen tawa chiokogo, ta osang ka ajanga metetdaksü.

Linük nung electric current agi kanga anüngba aser mapang shia light katiba anema pai sorkar ketdangsertem anema jembia liasü.

Arrshi küm 58 Pastor Alexis Padrón Lorenzo ya Havana Province kübok Regla Municipality nung aliba Communion in Faith Church nung pastor lir.

Ketdangsertemi taküm June 10 nü pua liasü aser September 11 nü chiokogo.

Khristan melungtet telok Christian Solidarity Worldwide (CSW)-i, joko mapang talangka electric current junga magütsüba den chiyungtsü aser mozü agi kanga anüngba dak sendakba nung sorkar ketdangsertemi nüburtem nem kuli tai agütsür, ta shia pastor-i sorkar ketdangsertem anema

nokdaka liasü, ta metetdaksü.

Cuba nung mapang talanglang light current katir, iba denji külemi chiyungtsü, mozü aser nüngdakba oset aikati kanga anünger.

CSW-i, Pastor Padrón Lorenzo tepuokdak aliba mapang nung pa shinga den-a tongtepratep mesüdaksü, aser ibaji ajanga aika shisabulua liasü, kechiyong pa dak teret teloktep angoba timtem lir, ta metetdaksü. Osangbener den jembidang pastor-i, "Detention centre nung ni kanga timtema liogo. Chiyungtsü karbo teraksa liasü aser karbo khenyongi mechiteti liasü," ta metetdaksü.

"Ozü kibong züngsemtem den pilabaji kanga tejashitsüka liasü. Yangji ni kanga timtemogo," ta pai ashi.

Pastor-isa, linük nung nüburtem kanga timtemba ngua pai ketdangsertem den tejashi lemsatepba agi pa apu, ajisüaka pai shinga amokmeren masü, ta ashi.

"Ni ayimdenba mapang nung tenüng shinga metetshi mesüra nisung kar alakteta aija ola adokba masü, ajisüaka ni sorkar ketdangsübaren anema ola adok," ta pai ashi.

"Atangji ni ola tashie adoka jembi aser 'kijai yimsüsüba anenang' ta ashi. Ajisüaka tensa raksatsütsüsa ni kecha mejembi," ta pai metetdaksü.

Pastor Padrón Lorenzo chiokogo, ajisüaka pa anema benokba ken o bo tang tashi magien. Ketdangsertemi pa dang hopta shia Hokolbar aser Amongnü anogotem nung ketdangsertem ajuruang, ta tuyuogo.

CSW nung Director of Advocacy aser Americas Team Leader Anna Lee Stangl-i, "Pei tebilemba jembiba ya temeden ka lir, anungji pei nüburtem atema ola adokba atema shinga pua mayutsüla," ta metetdaksü.

Laisa, tangsa pastor anema benoka aliba ken o agientsüla, ta takhangba agütsü.

ANOGO ABEN TSÜNGREM DEN

Medemertem Shimtetag

T.Ken 119:57-64

Medemertem akaba nung ajaki pelar. Asenoki parnokji nüngdaker. Ken züluri Tsüngrem O ji pa medemer ta ashi. "Shirnoki ne akhüm tsübur aser shirnoki ne ozüngtem benshir, parnok ajak medemerji ni lir" (t.63). Tsüngrem O i ashiba ama, pai pa medemertem shim. Asenok temetetteper aika lir saka medemerbo ishika dang lir. Mapang ajak nungbo nai mejembiba medemer kar lir. O mejembi mapang talangka külemi alitsü akok, aji saka temulungjangbo lungjema lir. Medemer kar denbo nai metsübui jembitetba medemertem lir. Nai ne mulungjang nung khuret magütsütsü akok, aser na pa den aliba agi nübusen tajungba asür.

Tsüngrem asenok tembar tajungtiba lir. Abraham dang Tsüngrem tembar ta aja, asenoka Pa tembar asütsü akok. Yisui nütsüngtem dang ashi, "Ni nenok dang kilir ta majar. Ni nenok dang tembartem ta ajar" (Yn. 15:15). Tembartemi kati ka den jembiteper. Aser asenoki Tsüngrem den jembira aser Pa O ajanga Pai asenok den jembidaktsüra, Pa tsübur aser Pa ozüng ayurtem medemer asenok asütsü.

Tembarsüba tongtipang tetentangba kaji Tsüngrem O tsütsü kü tembar mulungsentsü kechi aji lir. Pai ibaji agizüker asü? Pai Tsüngrem O ji ochi ta agizüker asü? Pai Tsüngrem tsübur aser meimer asü?

Tsüngrem O ajanga ni Tsüngrem den tesendaktep shidak lira, ni nübur den tesendaktep shidak nung lir. Kü tembartem Tsüngrem tembartem alitsü. Laishibai iba dang pilaa aliba ta ajar. Laishiba O nung alibaji temoatsü taküm ka lir.

Ne medemer kümdanga shimang. Parnoki Tsüngrem tsübur asü masü? Laishiba angatetta alibaji tembar tajung ta züngshiang. Tesendaktepji asenok mapang rizüngba lir. Parnokji teti tatem maka asoshi ta züngshiang.

Iran nung Arogo kiojen rakzükba atema UN-i tasüngdangba akar

September 17, 2026: Iran nung ketdangsertemi Protestant Arogo Tenla ki tejentiba rakzükba dak sendakba nung UN nung mongin anati Iran dang tasüngdangba kaa telangzüba meshir, ta osang ka ajanga metetdaksü.

Iran yimtiba, Tehran nung ketdangsertemi St Peter's Evangelical Church Tenla ki aser compound nung aliba kiojen ajak rakzükogo. Iba osang ya July ita nung ang temai adoka liasü.

Tenla ki aser Arogo kiojenji ali acre 10 nung lir. Idakji ki aika, school ana aser Bible Society den Council of Evangelical Churches indang office tem lir. Tenla ki compound nungji telidak Assyrian aser Armenian Khristan kibong 20 shi meindokogo.

Human Rights in Islamic Republic of Iran atema UN Special Rapporteur (SR), Mai Sato aser Freedom of Religion

or Belief Special Rapporteur, Nazila Ghanea nati July 10 nü Iran sorkar nem official shidi ka agüja liasü, ajisüaka UN inyakyim nung aliba ama iba shidiji anogo 60 lir sülen tang ang yimjak nung sangdonger.

UN ketdangser ana jagi, "Tang iba tatalokba ya tatalokba ka dang masü saka tesüiba küm aika Islamic Republic of Iran nung Khristantem anema inyaka aruba dak sendakba lir. Talisa Persian oshi nung tekülem sentong agir Khristantem anema inyaker," ta metetdaksü.

UN ketdangser ana jagisa Iran sorkar dang, Iran tesem balala nung Arogo meyong kiojen rakzüka agir, Tenla kitem shibangtsür, raksatsür mesüra tanga nüngdak atema amshir. Iba dak sendakba nung Iran-i Khristantem nem telangzüba magütsür, ta metetdaksü.

"Mapang ka nungbo Iran nung Persian oshi nung tekülem agiba Protestant

Arogo 50 shi liasü. Ajisüaka tanübo item Arogo ka danga mali. Iba dak alia Tehran, Isfahan aser Shiraz yimtitem nung Persian oshi nung tekülem agitsü melaba Anglican Arogo asem liasü saka Coronavirus wara sülenbo item Tenla ki lapoktsü memelar," ta tenatisa metetdaksü.

UN ketdangser ana jagi, tang tashi nungbo Iran ketdangsertem nungi telangzüba mangu aser ST Peter Tenla kiji sepaitemi nükdar, ta metetdaksü.

"Kangshia nisung meindokbaji international human rights ozüng den meputep," ta tenati metetdaksü.

Tehran nung aliba St. Peter Evangelical Arogo Tenla ki ya July ita nung ketdangsertemi shibangja liasü. Iba Tenla ki ya küm 150 tejaklen asüba lir.

Iba Tenla ki anasasa Orthodox Arogo Tenla ki ka, museum ka aser Armenian

nunger social club ka lir. 1990s mapang nung St. Peter Evangelical Arogo nung züngsem 150 nungi 200 shi liasü. Arogo nung züngsemtem rongnung Muslim, Yihuda aser Zoroastria yimsü toktsür Khristan yimsü agizükertem densema liasü.

Taküm June ita nung Iran sorkari Arogo compound ji linük meyong lir, ta sangdong.

"Security sepaitemi amokmerenba agi hopta ana tejaklen Arogo compound nung alir kibong 8 bo jena oadok. Iba sülen anogo ishika lir ano kibong ana jena oadok," ta Synod of Evangelical Church of Iran in Diaspora nung executive secretary, Sargez Benyamin-i tamalen metetdakja liasü.

Benyamin ya 2008 küm nungi 2015 küm tashi St. Peter Arogo nung pastor inyaka liasü.

Ketdangsertemi Tenla ki dang masü Arogo office aser synod secretary office nata

shibangtsü aser Arogo nung züngsemtem adenshiba mesüra tekülem agiba ajak nokdang.

Küm ter tejaklen Iran ketdangsertemi, St. Peter ya America nunger missionary temi tentetba lir, aser Arogo compound ya bendangertem meyong liasü, anungji sorkari tanaben agiadoktsü temeden lir, ta metetdaksü.

1979 küm sorkari St. Peter indang tebur school bo agiadoker liasü.

1979 küm Iran revolution mapang nung Iran nung Evangelical Arogoi Arogo compound tesadangbo American Presbyterian Mission dang nungi alizüker liasü, aser tezülutepba kuliji Arogo ket nung lir, ta Benyamin-i ashi.

1994 küm American Presbyterian Mission-i Washington nung aliba Iran diplomatic office ajanga tanüngba kiojenji-a Evangelical Synod nem agütsür, ta sangdonga liasü.

AO OSHI ANGAZÜKDAK:**TANÜ ANGAZÜKTSÜBA OJANG****Imdongden**

(n) ajungben nungdak asoshi (contingency)

* Kidang imdongden atema teti senotsü terabo ayutsüla.

Eshiolu

(adj) tera tuluka (little big)

* Kidang ajeptsü atema ak eshiolu ka bushir.

OLONG PAITEP # 7653

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti
- Tsük rudenba
- Temzüng tesashi
- S___i
- Nisung rongnung telemsa
- Anogoshi
- Ajanga aor
- Tsük rizüngdak
- Tebang nungi adokba
- Süngdong tatembangtiba
- Meputep

LANGTSÜNGLEN

- Tenük telong
- Committee dang ajar
- Yagi ki okdoker
- Yim lenmang
- Temoatsü keter meyipa aruba
- Kanga junga menemba
- Kenyongi majinü
- Rong kanga tulu

OLONG PAITEP # 7652 TELANGZÜBA**TIPIEN :**

- Semtu, 3. Lepko, 5. Bilem, 8. Ulu,
- Tsünpang, 11. Tesangwa,
- Aoksa, 15. Putir, 16. Yipru.

LANGTSÜNGLEN :

- Sayu, 2. Teb, 4. Kimong,
- Lungkak, 7. Milak, 9. Zünga,
- Temopu, 12. Walu, 14. Ali.

**MEIMCHIR TAKÜM ASER LIBALIRO :**

Jabaso : Oba ni yasüng pongmang nungji tenyar ka süoshi temesüng dang sobur anüng tom nungji nokdaker zülua sayu, nenok meimchir takümtem telemsa yamaia hi !

- Telok ka 90 % aser Telok ka 10%
- Telok ka 60% aser telok ka 40%
- Telok ka 30% aser Telok ka 70%

O Nisung ! na a koba Telok nung dena lir ta shirbo tenyarji samatoka. Ano tanabuba pongmang nungji kesa tenyarjisa anüng nungji nokdaker ashi. Temalen aliri ali tashi alutsü, saka teküpoklen aliribo tom tashi dang atutsü ta shirdang samatoka no,

Alokba : Tebusang nai pongmang tesashi ana pongmangogo, pongmangji asenok meimchir libaliru sayurdangar. Mezüngbuba nung 100 nung Nisung 90i tamajung timba bilemer aser 10 ibo tajung bilemer. Tanabuba nung 100 nung 60i tamajung timba jembir saka 40 ibo tajung jembir, Tasembubaji 100 nung 30i tamajung timba inyaker saka 70 ibo tajung inyaker ta ashir.

Tanabuba pongmangji ya, Nisung o shiruruna tetsünga nungya step ka dena lir , kodang Nisung ya mejungmesodir shiruru level tashi alur saka shirurubo komarka jungaka tombuba step tashiji dang atutsü ta ashir, süra asenoka kobala jenjang nung atentsü ta asüngdangaraja,

Jabaso : O Oba Alokba !!!

~ Lilir : I. Kilang Ajem, Indisen, Dimapur.

Manipur nung nisung 31,000 dak tema pei kidangi meyipa ogo

Manipur nung nisung 31,000 dak tema pei kidangi meyipa aoba noksa nung angur.

Imphal, Rongjui/September 17 (Agencies): Manipur nung kin o kin tsünga mangatettep adokba ajanga pei talidak ki toktsür jenshia or alir tesadang dak tema pei kidangi meyipaogo. State sorkari rehabilitation inyakyim balala benoka inyakdar aser iba atema Ministry of Home Affairs (MHA)-i sen crore 1,347.78 agütsütsü agizükogo, ta State Home Department sangdong ka ajanga metetdaksü.

2023 küm May ita mepetmesü tenzükba sülen rehabilitation atema amshitsü asoshi sen crore 949.63 bo agüjatokogo. 2023-24 küm sen crore 400, 24, 2024-25 küm crore 424.36 aser 2025-26 atema sen crore 523 agüjatokogo. 2026-27 financial year atema tang tashi

senotsü teyari agütsüba formally sangdonga mali, saka tang tashi nung sen crore 99.214 bo entokatokogo.

September 3, 2026 nü tashi nung pei ki toktsür or alirtem 28,899 dang kümogo, koba mepetmesü tenzükba mapang nungbo 60,000 shi liasü. State kübok tesem balala nung prokshir alirtem rongnung parnok 24,530 relief camp 105 nung jenoka lir aser nisung 4,369 khen atema talidak balalatem nung jenoka lir.

District tem rongnung Bishnupur nung relief-camp tem nung nisung timba jenoka lir. Iba distict nung camp 41 nung nisung 7,892 jenoka lir. Churachandpur nunga camp 19 nung nisung 5,195 jenoka lir aser Imphal West nunga camp 13 nung nisung 4,395 jenoka lir.

Kangpokpi nung nisung 3,389 relief camp 12 nung lidar aser nisung 2,506 khen atema tesem balala nung jenoka lir.

Tengnoupal nung relief camp tem ka danga lapoka mali, ajisüaka nisung 1,290 khen atema ki mesemer litepdar.

Nisung 31,823 pei talidak kidangi meyipa aoba sorkar data ajanga sayuogo. Item nisungtem meyipa yoktsü atema ki 7,034 yanglutsüogo aser ki teraksa 4,159 yanglushitsüogo.

Kasa mapang nung law enforcement agency temi 2026 küm February ita nungi August 31 nü tashi nung FIR 2,638 benokogo.

Ken o bushisüngdangba sülen nisung 1,463 puogo aser ken o 181 nung charge sheets benokogo, ta State Home Department-isa metetdaksü.

Lakhimpur police-i sorkar office intermediaries 100 dak tema puogo

North Lakhimpur, Rongjui/September (Agencies): Lakhimpur district kübok sorkar office aser agency tem meketa inyaksangshiba tetsünga dai aiertem aser tangar mesüzüksü meranger anema jenjang agiba mapang Lakhimpur Police-i nisung 100 dak tema puogo.

Ketdangsürtemi ashiba agi, iba inyakyim ya police stations, District Transport Offices (DTOs), revenue circle offices, pension offices aser Block Development Offices (BDOs) nung aser item office tem temeket nung benoka inyaka liasü. Nüburtem nem sorkar indang service aser welfare scheme balala teyongtsü nung inyaksangshirtem aziüoka indang agidaksütsü nükjidong nung iba meita aoba sentong ya benoka inyakdar.

Meita aoba mapang sübokrem agiba aser tanga aibelentem dena putetogo.

Nowboicha kübok Mohghuli indang Gaonburha Safiqul Islam, ali dak sendakba mapa ka atema yimdaklir ka dang nungi sen 20,000 meshia agiba atema puogo.

September 6 nü Islam-i pa indang office nung tambur ka dang nungi sen agizükba social media nung tawa ayimsünga prokshio.

Tanga ken o ka nung police-i, Laluk nung advocate Saheba Ahmed Bodhbarnü nikongtsütsü puogo. La ya kidang yariteper arishi küm 14 tain Arifa Begum soseta asüba ken o nung dak sendakba nung puogo. Arifa ya 2025 küm November ita asü.

Arifa tetsüi benokba FIR nung ashiba agi, la kanga

mezüngmeshia maksütsüba sülen 2025 küm November 5 nü herbicide jemer asü. Arifa ya Ahmed'er kidang teyariteper ama inyaka liasü.

Arifa ya Dibrugarh nung Assam Medical College and Hospital-i temang anepalutsü atema anir ao saka November 10 nü süatok.

Tetsürla tetsü yagi ashiba agi, Ahmed-i la dang Arifa tetong anema ken o ka benoktsü atema la nongshia liasü.

Police-i Bharatiya Nyaya Sanhita (BNS) kübok Section 108 dak ajemdaker Ahmed anema ken o ka benokogo.

Ahmed, shibai Laluk nung NGO ka achaayanga liasü, la taoba mapanga inyakyim balala atema aitsüogo. La indang NGO aser tanga inyakyim dak sendakba nung tang bushisüngdang südar.

Mizoram nung Anthurium benjung ayongzüka amungtsü

Aizawl, Rongjui/September 17 (Agencies): Mizoram nung October 1 nungi 3 tashi Anthurium benjung ayongzüka amungtsü. Alima penzürtem atsüa arutsü aser state nung tourism atema lenmang sadema lapoka aliba sayutsü atema iba benjung ayonger, ta ketdangsürtemi metetdaksü.

Anogo asem amungtsü aliba benjung ya Mamit district kübok Reiek aser Ailawng nung amungtsü, koba Aizawl nungi km 13 shi pilar lir.

Tourism Minister Lalnghinglova Hmar lenisüba nung Bodhbarnü iba sentong atema renemshiba lepa repringshitsü asoshi senden ka menogo. Pai ashiba agi, Mizoram nung tourism kanga kara renloka odar, aser alima penzürtem aika aruba ajanga local rongsenketzüng tajungba kümdakja dokan kiburtem, taxi anishirtem, süngo ayokertem aser tanga shishilembartem ajangzükar.

Benjung ya state sorkari ayongzüka ta shia Hmar-i,

sorkar department balala, lokti tentet balala aser nüburtem longjemer inyaksü ayongzüka liasü.

Ketdangsürtemi ashiba agi, benjung mapang sobaliba balala sayuba den südoksünemtsü aser adventure asoshi inyakyim balala alitsü.

Benjung mapangsa Leikapui Night mapang Mizo nunger nüngtugu kentenertem nem shilem agidaksütsü aser benjung shibangba aonung kentenba sentong tulu ka ayongzüka lir.

UNGER SENSO TELONGJEM ALICHEN

MOKOKCHUNG: NAGALAND

TENÜNGSANG AGÜTSÜR

Nagaland University ajanga agiba PG Examination 2026 nung Wb.Shilukaba aser Wt. Nungshikala na jala Kr. Talitemsula-i Sazolie College, Jotsoma nungi Department of History nung 8th Rank (7.76 CGPA) tongteta lai College Academic Citation Award ngutetba asoshi Tsüngrem tenüng asanger aser la nem Unger Senso Telongjem Alichen ajanga tenüngsang agütsür.

La tarutsü wadang nunga maneni Tsüngrem temoatsü aser lenisüba lidakjang ta USTA-i sarasademtsür.



Sd/-
Takutemjen
General Secretary, USTA

US-i Iran nung war crimes inyak ta amangtsüsa kuli ngutetogo: UN

Geneva, Rongjui/Sept. 17 (Agencies):

Iran nung kuli bushiba UN mission kati Brehostibarnü ashiba agi, February ita Iran nung school ka aser sports facility ka nung mitkari amakba ya United States mapa lir ta amangtsüsa kuli ngutetogo aser item inyakyim ya war crimes lir.

Parnokisa sorkar anema longkak aitba mapang Iran ketdangsürtemi pua merenshiba ya nisung meimchir anema mapa tamajung inyakba lir ta ngutet ta ashi.

Geneva nung aliba UN Human Rights Council nem agütsütsü aliba Independent International Fact-Finding Mission on Iran ajanga bushitetba report tasen nungya February ita tenzüka Iran rara nung US inyakyim asadang aser December ita tatemlen nungi linük tesem ajunga nung mepetmesü adokba nung Iran sorkari telangzüba agütsüba tem asadanga liasü.

US ketdangsür temi military operations ya law of armed conflict nung aliba ama inyak ta taoba mapang shia lir aser Iran-ia nisung meimchir temeden nung aibeln ta tai tongloksüba magizüker.

Minab yimti nung aliba Shajareh Tayyebbeh Primary School nung amakba ya US sepaitem mapa ta amangtsüsa kuli ngutetogo ta UN experts temi ashir, kong school tanur 120 densema nisung 150 dak tema tepset ta Iran ketdangsür temi ashir.

Ibai junga masadangi tapi agi amakba lir, kong civilian asü aser civilian indang ki o jen raksatsü, koba international law kübok war crime lir, ta mission ajanga bushitet.

Iba tesem nung Iran mitkar tanishir ka lir ta itdangiteri ashiba nung US-i temulung alem saka mamakdang osang ya abensa mejangja, ta report nung shia lir.

It dangiterba osang mejangjatetba aser iba ki ya 'military objective' ta mejangjaba ya zübazülema yutsüba kisüng masü, ta bushisüngdang temi ashi.

June ita US Tir Donald Trump-i shingaia metetsümonga Iran nung tetsür indang school mamak, ta iba tatalokba indang

bushisüngdang ka athishia shia liasü.

Iba sülen Pentagon-i bushisüngdangba jenjang ajungket saka parnoki bushitetba kecha temai madoktsü.

Kaket reju ya civilian meyong ta jangjateta liasü aser iba ya mitkar mapa asoshi amshiba kuli kecha mongutet, ta UN mongin temi ashi.

Lamerd nung aliba sports centre ka nung amakba atema mongin temi bushitetba kasa liasü. Iba tesem amakba mapang anasa nisung aliba ki tem aser kaket reju ka raksaja civilian 22 tepset aser yiru. Iba tesem amakba ya junga masadangi inyak, anungji war crime lir, ta parnoki ashi.

US Central Command-i March ita sangdong ka nung, US sepaitemi iba anogo Lamerd yimti nung mamak ta shia liasü.

Taoba küm December ita tatemlen longkak aitba mapang Iran ketdangsür temi tesem ajungalen tasa junga yanglur civilian dak amakba UN mission ajanga bushitet aser yangji ozüng agi memelai tepsetba, reshikangshia amshiba, tapi agi pua ayuba, tashiyim amshia samadaksüba aser 'freedom of expression' nung tenokdangba tesashi agütsüba dena lir, ta ashi.

1979 revolution sülen Shi'ite Muslim putir temi yimsü asü tenzüker ketdangsür temi maginüba inyakyim nokdangtsü asoshi tashiyim tesashitiba amshiba mapang nungya shilem magir saka anasa alirtema tepset ta rights groups temi ashir. Tehran-i, parnok anemertem aser bendanger tsükchir US aser Israel nati teyari agütsüba "kiralongrar aser longkak aitertem" dak tai tongloksü.

UN expert temi iba mapang nisung asüba mejangjateter ta ashir saka ketdangsür temi nisung 3,038 tepset aser 25,000 yirutsü ta ashiba dang kanga agi timba alitsü südi ta amanger ta ashi.

Longkak aitba atema sorkari telangzüba agüja azüdokshiba aser tepsetba, internet shibangba aser tasüba temerenshi agütsüba ya taoba mapang inyakba dang tesashiba lir ta report nung ashi.

Mecca Joint Defence Agreement renemtsü linük asem ariteper

Ankara, Rongjui/Sept. 17 (Agencies): Pakistan, Saudi Arabia aser Türkiye linüktem nungi technical team tem adendshia Mecca Joint Defence Agreement renema mapa kuma inyaktsü atema shisa agitepba tali kumogo, ta Turkish security ketdangsür osang ajanga ashi.

Tang tesüsa olemtepba ya iba agreement nung aliba institutional structure, amalitep akatsü inyakyim aser meyongnem agütsür asem teinyaktsü densema komasür mapa kuma inyaktsü ta tejangja telemtetba agütsü nung rangloker. Technical-level senden tem amener aser ano aruya aliba hopta tem nung maneni shisa agiteptsü aser taruba technical committee senden ya October ita Pakistan nung amentsü akok, ta osang ajanga ashi.

West Asia nung tensa mejungi Yemen nung Iran-i yariba Houthi telungpur densema rara adokba ajanga Saudi Arabia lendong nung lia

iba mera ya agir.

Pakistan, Saudi Arabia aser Türkiye-i Mecca Joint Defence Agreement ya August 7 nü zülutepa linük asem tsüngta defence tsütsü amalitep tajungba akumtsü aser arok security atema züngzüktepa liasü. Iba tezüngzüktep nungya züngsem ka dak amakba ya züngsem asemprong dak amakba ama züngshitsü shia lir.

Linük asem yagi iba atema 'institutional mechanism' yanglutsü atema mera agiogo. Istanbul nung August 31 nü Strategic Political and Defence Committee senden amendang linük asem nungi foreign aser defence ministers aser mitkar tanishir temi amalitep akangshitsü, defence tashi itshtitsü mulungtepa liasü. Saudi Arabia nung teti atema secretariat ka amenoktsü aser mezüng küm asem atema Pakistan nung secretary general ka tekolakba asütsü.

Iba agreement nungya defence-industry cooperation,

joint technology development and production nung tali rangloksü aser linük asem armed forces külemi lungjemer inyaktsü asoshi merangtsü shia lir.

Saudi Arabia aser Houthis densema West Asia nung tensa tamajungba akumba mechi iba pact ya tekeraba nung renemtsü nüngdaka akumer.

Pakistan ya Saudi defence partner ka ama tezüngzüktep nung aliba ama inyaktsü nüngdaker aser külen Iran den tesendaktep junga liner. Islamabad-i tensa tali tamajungba mekumdaaktsütsü nükjidong nung osang abentsü meranger.

Pakistan indang Foreign Office-i iba agreement ya defensive yimya ka lir aser regional security nükjidong nung lir ta ashir. Züngsem timba akumtsü atema tangbo tebilemba mali aser tang atemabo züngsem linük asem tsüngta amalitep akangshitsü meranger ta ashir.

US House nung Russia merenshitsü bill agizükogo



Washington, Rongjui/Sept. 17 (Agencies):

Bodhbarnü US House of Representatives ajanga Russia sanctions bill ka agizükogo, anungji Tir Donald Trump-i India densema Russia indang totzü aser gas aliba linüktem dang tariffs shilem 100 junga meshitettsü.

Republican-i aniba House nung iba mera ya vote 262-159 agi agizüka Trump dangi pa meyongnem agütsütsü atema yoker, koba ita aika menur asangsang akumer. Iba legislation dang Lindsey O. Graham Sanctioning Russia and Iran Act of 2026 ta ajar aser iba bill ya taoba ita Senate nung 86-11 vote agi ajanga liasü.

Iba ozüng yagi Moscow nem Ukraine den raraba mechi rongsenketzüng tsütsü tenokdangba tali agütsütsü meranga Russia indang energy aser defence sectors aser ano sanctions paidoktsü atema

amshiba "shadow fleet" totzü abenba rong tem nung tenük yoker.

Iba bill yagi Russia totzü aser natural gas aliba linük tulutem dang tariff shilem 100 junga meshitsü Trump nem tashi agütsür. Russia indang totzü tazü timtiba aliba linüktem rongnung India aser China lir, anungji linük ana dang ano tariff talila meshitsü akok.

Iba mera yagi Tir dang Russia nung totzü mesüra gas timtiba aliba linük pongu nung tenük yoktsü tuyur aser Russia indang natural gas shilem 15 dang tajemba aliba linüktem aser aliba ajemtsü asoshi mera tulu agir aliba linüktem dang tariff memeshitsü tashi agütsür.

Iba ozüng nungya tariff meshitsü atema India aser China densema linük ter tenüng tejangja tetshia lir.

India asoshi iba legislation

yagi Washington-i tariffs shilem 100 junga meshitsü temelaba tasen ka agütsür, kechiaser India-i maneni Russian energy alir.

Iba bill nungsa Iran dak sendakba sanctions tema ulushir aser foreign policy mera tuluba nung bendenloksemer.

Iba legislation ya April 2025 nung benokba sülen US ozüng yanglur aikati memulungi aru, saka küm tetenzüklen Trump-i bhukuma nokdakba sülen temelenshi aru. Iba bill ya asür Republican Senator Lindsey Graham aser tanga ozüng yanglurtemi benoka liasü.

Russia-i 2022 küm February ita tashi ajak amshia Ukraine amak tenzü, aser linük balalai tangatettep kati arudaktsütsü merangaka rara ya manener.

Trump-i US tariffs aser sanctions tashi amshitsü lenmang bushia aru, saka iba bill agizükba ajanga Congress nem Russia aser par den shishilempar nem rongsenketzüng tsütsü tenokdangba agütsütsü asoshi tashi tuluba agütsür.

Russia dak tenük yoker US-i sanctions tasen agütsüba ajanga Ukraine nung rara atema yimjung bushiba nung benjatsü, ta Kremlin-i Brehostibarnü shiogo.

"US-i sanctions tali agütsüba ajanga Ukraine nung yimjung alitsü asoshi bushiba aser inyakba tsütsü temetetba benjatsü," ta Russia odongtar Dmitry Peskov-i ashi.

Zunheboto nung Inter-Departmental Tournament tenzükogo



Dimapur, Rongjui/September 17 (TYO): 13buba Zunheboto District Inter-Departmental Tournament September 17 nü Indoor Badminton Stadium, Zunheboto nung tenzükogo. Asayamung lapokba sentong nung Advisor for Food & Civil Supply, Legal Metrology & Consumer Protection, and Chairman of Urban Local Bodies & Village Council Committee, K. Tokugha Sukhalu, IAS (Retd) alakteta jaoker liasü.

Sorkar tenzükertem aser department balala yongsü nung saisabong sobaliba tajung ka tentetdaksütsü, telongjem adokdaksütsü aser sportsmanship ajungkettsü nükjidong nung District Planning & Development Board (DPDB), Zunheboto-i ayongzükba iba asayamung asayadar.

Anogo asem asayatsü aliba asayamung ya September 17 nungi 19 tashi asayatsü.

Asayamung lapokba sentong nung o jembiba mapang K. Tokugha Sukhalu-

i, lanurtem nem teamwork a n g a z ü k d a k t s ü t s ü , yimyayimpong tajung sübadaksü, peisasa dak temulung lemteta kümdaksütsü atema saisabong ya koda tongtibang iba indang lemsatapa liasü. Paisa, lanurtem pei tashi aser sempet ya tajangzük ka-a amshitsü asoshi ajungmesotsü nüngdaker ta ashi.

Sukhalu-i, terenlok ya longjemer inyakba aser nüburtem ajangzükdaksütsü atema bendanga agüja inyakba ajanga bener arutsü ta ashi.

Asayamung nung shilem agitsüpurtem tenangzüktepba District Sports Officer, Zunheboto, Anguvito Sumi-i ketdangsüa agi aser iba sülen Sukhalu-i asayamung formally tenzükja liasü.

48buba Inter-District & State Badminton Championship 2026 nung Zunheboto District Badminton Association (ZDBA) nungi asayartemi kanga junga shilem agiba sülen tang iba asayamung ayongzükba asayar. Iba asayamung nung

ZDBA nungi asayartemi takok tajung nguogo, koba asayamung lapokba sentong nung metetdaksü, aser Zunheboto District aser state nem konang tetushi bener arutsüba atema parnok nem tenüngsang agüja liasü.

13buba Inter-Departmental Tournament ajanga sorkar department tem yongsü nung saisabong sobaliba tajung ka sübadaksütsü aser sorkar tenzükertem nem teamwork tali tajungba angatetdaksütsü imlar.

Maneni sempet tajung aketba lanurtem ajungmsotsü aser Zunheboto terenlok atema longjemer inyaksü asoshi ayongzüktsü nükjidong nung iba asayamung ayongzükogo.

Asayamung lapokba sentong ya Tourist Officer, Zunheboto, Lentina Longkumer lenisüba nung agi, Pastor, SBCZ, Ghunato Assumi-i sarasadem, Sakupu K. Awomi-i ken tajung ka aten aser Additional Deputy Commissioner, Zunheboto, Shaying Sheu-i lokti pela agizükba o jembia liasü.

ICC T20I Rankings: Abhishek Sharma-i Sahibzada ajatetogo



Rongjui/September 17, 2026 (Agencies): Afghanistan den tang asaya aliba T20I asayamung nung kanga junga asayaba sülen Abhishek Sharma batter tem rongnung tanabuba jenjangi tuogo, aser bowler tem rongnung Varun Chakravarthy top five-i iogo.

Delhi nung asaya aliba iba asayamung nung asaya asem asayatsü aliba nungi India-i asaya anabo kokatokogo. Jasprit Bumrah, Arshdeep Singh, Axar Patel aser Sanju Samson nung ajak rankings nung tejakdangi tuogo.

Iba asayamung nung

Abhishek-i kanga junga asaya arudar. Mezügbuba asaya nung pai run 82 yangluba sülen pa ICC T20I batter rankings nung jenjang ka tejakdangi tua tang tanabuba nung lir.

Left-handed batter yagi Pakistan nung aser Sahibzada Farhan ajatetogo aser teammate Ishan Kishan sülen tanabuba jenjang nung lir. Sanju Samson-a jenjang pezü tejakdangi tua tang 30buba nung lir. Tanabuba asaya nung pai half century ka yanglua liasü.

Bowler tem rongnungi Varun Chakravarthy jenjang ana tejakdangi tua tang pongububa

nung lir aser Bumrah-a jenjang tenet tejakdangi tua top 10-i iogo. Arshdeep Singh 14buba nung lir aser Axar Patel-a 27buba tongtetogo.

Afghanistan all-rounder Azmatullah Omarzai-a T20I all-rounder rankings nung tejakdangi tuogo. India den mezügbuba asaya nung pai half century ka yanglua liasü.

ODI rankings nung Nathan Ellis aser Matthew Renshaw nata jenjang junga kümogo. Harare nung Zimbabwe run 59 agi akokba asaya nung pacer Nathan Ellis-i wicket pongu agiba sülen pa jenjang 20 tejakdangi tua tang 20buba tongtetogo.

Kasa mapang nung Matthew Renshaw shibai run 109 yanglua Player of the Match naroküm ngua liasü, pa top 100 tema nung aliba tang 68buba tongtetogo. Cooper Connolly-ia run 51 yangluba sülen pa jenjang teku (77buba) tejakdangi tuogo.

Asian Champ's atema Pakistan team India-i arutsü memulunger

Rongjui/September 17, 2026 (Agencies): Asian Hockey Champions Trophy atema Pakistan team India-i marutsü aser board-i parnok asayatem neutral venue kati belener odaksüner. Iba asayamung ya Mohali nung October 27 nungi November 5 tashi asayatsü lir.

September 16 nü PTI sangdong ka ajanga, Pakistan Hockey Federation, Pakistan sorkar nungi temelaba atadar, ta ashi. Iba sülen hockey federation yagi parnok asaya tanga tesem kati belener aotsü mepeshia liasü.

"Pakistan aser India na tang bilateral aser security dak sendakba nung mangatettep aliba apir asayartem aser ketdangsürtem teküzmükba kübok toktsütsü atema iba telemtetba agiogo. Pakistan Asian Champions Trophy nung asayatsü aser hockey asayatsü ajungkettsü atema bendanga agütsür lir. Onok India densema FIH züngsem ajak den asayatsü renema lir, aser saisabong aser yimden yimsüsüba na memeyoktepdaksütsü atema bendanga agütsür lir," ta Pakistan hockey federation tir Mohyuddin Ahmed Wani-i ashi.

"Pakistan team kecha minprong makai shilem agidaksütsü atema onoki neutral venue ka atema asüngdangba ya Asian Hockey Federation-i agizüktsü imlar," ta pai shisem.

Pakistan-i 2025 küm Asia Cup aser Junior Men's Hockey World Cup nunga shilem magi. Bihar nung asayaba Asia Cup nung Pakistan melen Bangladesh asaya aser Tamil Nadu nung Junior World Cup nung Pakistan melen Oman asaya.

Pakistan cricket team-a neutral venue tem nung asaya arudar. Parnok tatamsa 2023 ODI World Cup atema India-i arua liasü. 2025 küm Champions Trophy atema India team-a Pakistan-i mao aser parnok asayatem Dubai nung asaya liasü.

2026 küm Pakistan team T20 World Cup atema India-i maru aser parnok asayatem Sri Lanka nung asaya. India-i ayongzükba asayaba mapang Pakistan tetsür team-a 2025 ODI World Cup asayatem Sri Lanka nung asaya liasü. Parnok mezügbuba Champions Trophy atema-a India-i marutsü aser neutral venue ka nung asayatsü.

Coutinho Santos nung denogo



Rongjui/September 17, 2026 (Agencies): Philippe Coutinho tang asaya aliba season tatem tashi asayatsü asoshi Brazil team-mate aser pa tembar Neymar asayaba club Santos FC nung denogo.

Taoba mapang Liverpool aser Barcelona midfielder ya February ita Vasco da Gama toktsüba sülen club ka nungi danga masayai liasü.

Coutinho ya 2024 küm pa lanuwa asayaba club-i meyipa ao, saka asaya 81 nung asayaba sülen tokja liasü. Pa tekelok shisatsü kanga belemogo, ta shia iba club toktsü.

Santos-i, Coutinho aser Neymar na indang noksa tejen ka den pa gym nung training agiba noksa ka lemsatapa asayar ya pelashishia agizükogo.

Club-isa, Coutinho dressing room-i aiba mapang Neymar-i pa agizükba indang video ka lemsatapa liasü.

Neymar ya taoba küm January ita pa lanuwa asayaba club nung ya aden aser tang mezügbuba tembar ana ya club jenjang nung külemi asayatsü.

Coutinho Vasco nungi asaya-a pa indang career tenzük aser iba sülen Inter Milan nung aden. 2013 küm pa Liverpool nung oa aden kong pai asaya 201 nung goal 54 idaksü. Iba sülen pa 2018 küm pound million 142 yong Barcelona nung dena liasü.

Maneni pa Bayern Munich, Aston Villa aser Al-Duhail nunga asaya aser iba sülen Vasco-i meyipa ao.

BILEMDANGANG

"Na kechi agi amokseper
iba nung pila liang."